

每週經課朗誦經文(巴克禮漢羅/教羅)2015/07/12

共同經課 - 1

撒母耳記下六章一節~五節，十二 b 節~十九節

1 大衛 koh 聚集以色列中所揀 ê 三萬人。2 大衛起身 choā tè 伊 ê 眾百姓，tùi Pa-láh 猶大去，beh tùi hia 扛上帝 ê 櫃來；chit-ê 櫃 ê 名是用坐 tī 兩個 ki-lō 兵 ê 中間萬軍 ê 耶和華 ê 名來稱 ê。3 In hē 上帝 ê 櫃 tī 新 ê 車，tùi 山頂 A-pí-ná-tát ê 家載出來；A-pí-ná-tát 兩個 kiáⁿ，O-sat kap A-hi-iok，趕 hit-ê 新車。4 In 將伊 kap 上帝 ê 約櫃，tùi 山頂 A-pí-ná-tát ê 家載出來。A-hi-iok 行 tī 櫃 ê 頭前。5 大衛 kap 以色列 ê 全家，tī 耶和華 ê 面前用松柴所造 tak 號 ê 樂器，kap 琴、瑟、lin-long 鼓、大鼓、鉞(poát)，來作樂跳舞。12b 大衛就去，歡喜扛上帝 ê 櫃 tùi Gô-piat-i-tong ê 厝，到大衛 ê 城。13 扛耶和華約櫃 ê 人行六步，大衛就獻一隻牛，kap 一隻肥 ê cheng-siⁿ，做祭祀。14 大衛 tī 耶和華 ê 面前盡力跳舞。大衛 hā 幼苧布 ê í-hut-tek。15 An-ni 大衛 kap 以色列全家扛耶和華 ê 櫃上來，出歡喜 ê 聲，pùn 哨角。16 耶和華 ê 櫃入大衛城 ê 時，掃羅 ê cha-bó-kiáⁿ Bí-kah tùi 窗 á 門看，看見大衛 chông 起來跳舞 tī 耶和華 ê 面前，心就看輕伊。17 In 扛耶和華 ê 櫃入去，hē tī 伊 ê 所在，就是大衛所為伊搭 ê 布棚；大衛 tī 耶和華 ê 面前獻燒祭 kap 謝恩祭。18 大衛獻燒祭 kap 謝恩祭明白，就用萬軍耶和華 ê 名 kā 百姓祝福。19 Koh tī hiah-ê 眾百姓，就是以色列眾人，無論男女，每人分 hō in 一個餅，一塊肉，一個葡萄干餅；眾百姓就去，tak 人 tò 去 in ê 厝。

共同經課 - 2

詩篇二十四篇

1 大衛 ê 詩。1) 地 kap 其中所充滿 ê，世界 kap tiàm tī 伊中間 ê，lóng 屬耶和華。2 伊將地建立 tī 海 ê 頂面，安置 tī 大水 ê 頂面。3 Chī-chūi 能上耶和華 ê 山？Chī-chūi 能 khiā tī 伊聖 ê 所在？4 就是手清氣，心清潔；存心無 ng 虛假，chiù-choā 無 khng 奸詭 ê 人。5 Chit 號人 beh 得 tiòh 耶和華賜福；Koh tùi 救伊 ê 上帝得 tiòh 義。6 Chiah-ê 是 chhē 耶和華 ê 族類，雅各 ê 上帝 ah，這是 ài 見你 ê 面 ê 人。[Sè-láh] 7 城門 ah，kiáh 起 lín ê 頭；永遠 ê 門 ah，lín tiòh 受舉起；榮光 ê 王 beh 入。8 Hit-ê 榮光 ê 王是 chī-chūi？就是大氣力大權能 ê 耶和華，Tī 交戰有大權能 ê 耶和華。9 城門 ah，kiáh 起 lín ê 頭，永遠 ê 門 ah，lín 亦 tiòh kiáh 起；榮光 ê 王 beh 入。10 Hit-ê 榮光 ê 王是 chī-chūi？萬軍 ê 耶和華，伊是榮光 ê 王。[Sè-láh]

共同經課 - 3

以弗所書一章三節~十四節

3 願咱 ê 主耶穌基督 ê 上帝，也是伊 ê 父，得 tiòh o-ló；伊 tī 基督 bat 賞賜咱 tī 天裡 tak 項屬 tī 神 ê 福氣；4 就是照伊創造世間 ê 事先 tī 基督揀咱，hō咱 tī 伊 ê 面前成做聖，無 thang 嫌；5 伊照伊 ê 旨意所歡喜 ê，用仁愛事先定 tiòh 咱 tùi 耶穌基督得 tiòh 做 kiáⁿ，來歸 tī 伊，6 hō伊恩典 ê 榮光得 tiòh o-ló；chit-ê 恩典就是伊 tī 所疼 ê Kiáⁿ 賞賜咱 ê；7 tiàm-tī 伊咱 tùi 伊 ê 血得 tiòh 贖回，赦免罪過，照伊恩典 ê 富有；8 伊將 chit-ê 恩典，用 tak 樣 ê 智慧 kap 見識，賞賜咱到滿滿；9 已經 hō咱知伊旨意 ê 奧妙，照伊 ê 好意，就是伊 tī 本身所事先定 tiòh ê，10 beh tī chiah-ê 日期完滿 ê 時，設法 hō萬物，不論 tī 天裡 ê tī 地裡 ê，lóng tī 基督來合一；11 tiàm-tī 伊咱也成做家業，就是事先受定 tiòh ê，照 hit-ê thàn 家己 ê 旨意行萬項有 ê 意思，12 beh hō伊 ê 榮光 tùi 阮事先 ng 望 tī 基督 ê 人得 tiòh o-ló；13 tiàm-tī 伊，lín 也已經聽見真理 ê 道，救 lín ê 福音，既然信就 tiàm-tī 伊有受所應允 ê 聖神蓋印，14 伊就是做咱承接業 ê chún-tng，到上帝所得 tiòh ê 業贖回，hō伊 ê 榮光得 tiòh o-ló。

共同經課 - 4

馬可福音六章十四節~二十九節

14 希律王聽見，因為耶穌 ê 名聲已經出；就講，行洗禮 ê 約翰 tùi 死人中 koh 活，所以有 chiah-ê 權能 tùi 伊顯出。15 但是有別人講，是以利亞。Koh 有人講，是先知，親像先知中 ê 一個。16 總是希律聽見就講，我所 thài 頭 ê 約翰已經 koh 活。17 因為希律家己 bat 差人掠約翰，縛伊 tī 監裡，是為 tiòh 希律 ê 兄弟腓力 ê bó希羅底 ê 緣故；因為希律有娶伊。18 是約翰 bat kā 希律講，你娶兄弟 ê bó是不該。19 希羅底就怨恨約翰，ài thài 伊，也 boē 得 tiòh。20 因為希律知約翰 ê 做人義 koh 聖，所以驚畏，來保護伊；聽伊 ê 話，就大大躊躇，也歡喜聽伊。21 tng-tiòh 好機會 ê 日，就是希律 tī 生日辦桌，請 hiah-ê 大官、千總 kap 加利利尊貴 ê 人。22 希羅底親生 ê cha-bó-kiáⁿ 人去跳舞，hō希律 kap 同桌 ê 人 lóng 歡喜；王就 kā cha-bó gín-ná 講，見若你所 ài ê，求我，我 beh hō你。23 Koh kap 伊 chiù-choā 講，見若你所求我 ê，雖然我國 ê 一半，我也 beh hō你。24 Cha-bó gín-ná 出去 kā 伊 ê 老母講，我 beh 求甚麼？應講，行洗禮約翰 ê 頭殼。25 Cha-bó gín-ná liām-piⁿ 走入去，見王求講，我 ài 你將行洗禮約翰 ê 頭殼 toé tī 盤裡即時 hō我。26 王就大憂悶；總是為 tiòh 伊所 chiù ê choā，koh 有同桌 ê 人 tī-teh，所以 m̄ ài 推辭。27 王即時差一個侍衛，吩咐取伊 ê 頭殼來；28 伊就去監裡，thài 伊 ê 頭，toé 伊 ê 頭殼 tī 盤裡，捧來 hō cha-bó gín-ná，cha-bó gín-ná 就 hō伊 ê 老母。29 約翰 ê 學生聽見，就來收伊 ê 身屍，埋葬 tī 墓裡。